

四庫全書

史部

欽定四庫全書

史部

欽定皇輿西域圖志卷十三

四

詳校官通政使_臣夢吉

檢討_臣德生覆勘

總校官候補中允_臣王燕緒

校對官中書_臣吳樹萱

謄錄監生_臣褚兆麟

欽定四庫全書

欽定皇輿西域圖志卷十三目錄

疆域六 天山北路三

伊犁西路

和爾郭斯

哈討

摩該圖

哲克得

雅木勒克

察臣哈喇

哈喇塔勒

達蘭呼都克

托博隴

庫克車勒

圖古里克

庫爾圖

古爾班阿里瑪圖

塔拉噶爾

圖爾根

古爾班察畢達爾

古爾班沙濟孩

塔拉錫克

沙圖

庫爾墨圖

古爾班呼蘇台

古爾班薩薩

春濟

庫納薩爾

烏蘭哈勒噶

濟爾噶朗

圖爾根阿察

古爾班哲爾格斯

阿爾沙圖

特布克

野特庫斯

招哈

古爾班伊勒噶齊

巴勒滾

塔瑪噶

托薩爾

通

阿克賽

烘郭爾鄂籠

科什噶爾

裕勒阿里克

什巴爾圖和碩

吹

薩勒奇圖

沙木什

格格圖布拉納

阿什圖

達布蘇圖

阿爾察克圖

伊蘭巴什

庫努克薩爾

索郭魯克

哈喇巴勒圖

古爾班哈納圖

阿什布里

和爾袞

英噶爾

伯得里克

額得墨克

塔拉斯

烏勒木木納爾

薩爾巴噶什

欽定皇興西域圖志卷十三目錄

欽定四庫全書

欽定皇輿西域圖志卷十三

疆域六

天山北路三

伊犁西路 自伊犁西北行北至巴勒喀什淖爾西
至吹塔拉斯俱連沙磧通藩屬右哈薩克界東北
接藩屬左哈薩克界東接伊犁東路界南至天山
逾山接天山南路阿克蘇烏什界

和爾郭斯

和爾郭斯在伊犁西一百三十里有屯田自和爾郭斯西北行六十里為奇齊克又西行六十里為奎屯又南行六十里為惠番又自奎屯西北行六十里為博羅呼濟爾又自奎屯西行九十里至烘和爾鄂籠皆在伊犁郭勒北境層山枕疊地當險要並設卡倫於此又西為庫隴奎鄂拉

哈討

哈討在伊犁郭勒北岸庫隴奎鄂拉南五十里

摩垓圖

摩垓圖在哈討東北一百里庫克烏蘇哈喇塔勒兩河之間

哲克得

哲克得在摩垓圖東北八十里踰河至其地

雅木勒克

雅木勒克在哲克得西北六十里

察臣哈拉

察臣哈拉在雅木勒克西北五十里兩河之間北
傍巴勒喀什淖爾

哈喇塔勒

哈喇塔勒在巴勒喀什淖爾南格登鄂拉北

達蘭呼都克

達蘭呼都克在哈喇塔勒西二十里巴勒喀什淖

爾南格登鄂拉北五十里

托博隴

托博隴在巴勒喀什淖爾南舊為淮噶爾額爾克騰部拓克游牧處

庫克車勒

庫克車勒在巴勒喀什淖爾南阿勒坦額墨爾鄂

拉北

圖古里克

圖古里克在庫克車勒南一百里伊犁郭勒北

唐書突厥傳吐陸可汗弟同娥設立為沙鉢羅唃
利失可汗後西部自立欲谷設為一毗吐陸可汗
乃因伊列河約諸部河以西授令於吐陸其東唃
利失主之自是西突厥又分二國矣

按唐時沙鉢羅唃利失可汗分國為十部居碎
葉東西是唃利失初轄之境甚廣至西部復立
乙毗吐陸可汗之後乃因伊列河為界唃利失
僅主河東之地今自哈討至圖古里克屬伊犁

郭勒東北境是在唐時伊列河東者宜為西突厥既分二國之後唃利失所轄之西境也

庫爾圖

庫爾圖在伊犁郭勒南二十里踰一支河至其地舊為準噶爾布庫斯鄂拓克游牧處

古爾班阿里瑪圖

古爾班阿里瑪圖在伊犁郭勒南庫爾圖東二十里踰两支河至其地舊屬準噶爾庫本諾雅特部

鄂齊爾烏巴什之昂吉

塔拉噶爾

塔拉噶爾在伊犁郭勒南阿里瑪圖東四十里踰
一支河至其地地有三泉

圖爾根

圖爾根在伊犁郭勒南岸塔拉噶爾東二十里踰一支
河至其地舊為準噶爾多果魯特鄂拓克游牧處

古爾班察畢達爾

古爾班察畢達爾在伊犁郭勒南岸圖爾根東三十里

古爾班沙濟咳

古爾班沙濟咳郭勒南岸古爾察畢達班察畢達爾東三十里地有三泉

塔拉錫克

塔拉錫克在伊犁郭勒南二百里踰阿克固雅斯郭勒塔拉錫克郭勒至其地

沙圖

沙圖在塔拉錫克南六十里踰河至其地西為烏
蘭烏蘇東為鄂台郭勒

庫爾墨圖

庫爾墨圖在沙圖西三十里

古爾班呼蘇台

古爾班呼蘇台在庫爾墨圖西三十里

古爾班薩里

古爾班薩里在古爾班呼蘇台西三十里

唐書突厥傳沙鉢羅咥利失可汗分其國為十部

部以一人統之人授一箭號十設亦曰十箭為左

右左五咄祿部置五大噉居碎葉東

右五弩失畢部詳見後額

得墨克條

又賀魯已滅突騎施阿利施部為絜山都督

府

按唐時碎葉川為今之圖斯庫勒

詳見水

突厥咥

利失可汗置五大咄所謂五咄陸部居碎葉東

者當在今圖斯庫勒之東跨伊犁郭勒左右也

五咄陸部中突騎施索葛莫賀部為溫鹿州都

督府突騎施阿利施部為絜山都督府溫鹿州

都督府在今伊犁

說見前卷

其絜山都督府必與溫

鹿毗連者今自哈討至古爾班薩里凡屬伊犁

郭勒下流左右環抱水草豐饒之境其為絜山

都督府地可知又考突厥傳其後西部別立乙

毗咄陸可汗因伊犁河約諸部河西受令於咄

陸在今則自伊犁郭勒西至圖斯庫勒吹塔拉斯
諸地皆乙毗咄陸可汗所轄而附近伊犁西南
岸自奎屯庫爾圖至古爾班薩里一帶應屬
乙毗咄陸可汗所轄之東境也又按突騎施烏
質勒以碎葉川為大牙伊麗水為小牙兩牙之間
皆其故壤其在于今則自伊犁郭勒至圖斯庫
勒又當為烏質勒地

以上自伊犁西北行至巴勒喀什淖爾之路

春濟

春濟在伊犁西南三百里又西南六十里為塔木
哈又西南行一百里為特木爾里克又南行三十
里至格格根又南行四十里為呼圖克拜又南行二
十里為鄂爾和珠爾又南行四十里為哈爾奇拉
山谷聯延並設卡倫是為伊犁西南境又南踰山
接回部賽喇木界

庫納薩爾

庫納薩爾在伊犁西南二百里特克斯郭勒發源處

烏蘭哈勒噶

烏蘭哈勒噶在庫納薩爾西二百里西北距圖斯庫勒一百里

濟爾噶朗

濟爾噶朗在烏蘭哈勒噶東南十里踰一小嶺至其地西北距圖斯庫勒一百餘里

圖爾根阿察

圖爾根阿察在濟爾噶朗西南二十里踰一支河
至其地西北距圖斯庫勒一百里

古爾班哲爾格斯

古爾班哲爾格斯在圖爾根阿察西北五十里西
北距圖斯庫勒五十里地有三泉出南山咸滙入
於圖斯庫勒又自此西行至烘郭爾鄂籠凡圖斯
庫勒南岸地總名特木爾圖其南境為天山正幹

之木素爾鄂拉薩瓦布齊鄂拉

阿爾沙圖

阿爾沙圖在圖斯庫勒東南岸相傳其地有溫泉

特布克

特布克在圖斯庫勒東岸支河之間

野特庫斯

野特庫斯在阿爾沙圖西三十里東為哈喇郭勒

西為大小烏蘭烏蘇

招哈

招哈在圖斯庫勒南岸野特庫斯西四十里踰大
小烏蘭烏蘇至其地

古爾班伊勒噶齊

古爾班伊勒噶齊在圖斯庫勒南岸招哈西三十里
巴勒滾

巴勒滾在圖斯庫勒南岸古爾班伊勒噶齊西二
十里

塔瑪噶

塔瑪噶在巴勒滾西二十里

托薩爾

托薩爾在圖斯庫勒南岸塔瑪噶西十五里踰一支河至其地

通

通在圖斯庫勒南岸托薩爾西十五里踰一支河至其地

阿克賽

阿克賽在圖斯庫勒南岸通西二十里踰一支河至其地

烘郭爾鄂籠

烘郭爾鄂籠在圖斯庫勒南岸阿克賽西二十里踰一支河至其地又西為烏布什布拉克又西為鄂拉郭勒自阿爾沙圖至此東西四百里之間水草豐饒地宜游牧舊為準噶爾和碩特部沙克都

爾曼濟之昂吉

科什噶爾

科什噶爾在圖斯庫勒西岸

裕勒阿里克

裕勒阿里克在圖斯庫勒西岸

什巴爾圖和碩

什巴爾圖和碩在圖斯庫勒東岸南北两支河之間又西五十里為哈喇諾海又西三十里為沙圖

又西五十里為庫爾墨圖又西四十里為推圖墨克
又西三十里為察伊巴哈圖又西三十里為和岳滿察
罕烏蘇又西四十里為古爾班薩里又西四十里為古
爾班克敏皆圖斯庫勒北岸地水草之利遜於南岸
唐書王方翼傳方翼築碎葉城面三門紆環多趣
以詭出入五旬畢西域胡縱觀莫測其方畧地理
志北庭都護府注渡伊麗河一名帝帝河至碎葉
界又西行十里至碎葉城又碎葉川口八十里至

裴羅將軍城又西二十里至碎葉城北有碎葉水
突厥傳定方追賀魯至碎葉水盡奪其衆突騎施
烏質勒屯碎葉西北稍攻得碎葉即徙其牙居之
謂碎葉川大牙弓月城其城東隣北突厥西諸胡
東直西庭州盡并斛瑟羅地其子温鹿州都督娑
葛後與弟遮弩分治其部遮弩叛歸默啜默啜擊
娑葛禽之并殺遮弩突騎施別種車鼻施啜蘇祿
者哀拾餘衆復雄西域開元五年始來朝授右武

衛大將軍突騎施都督蘇祿子吐火仙骨噉為可
汗居碎葉城殞西節度使蓋嘉運率石王史王共擊
蘇祿子破之碎葉城吐火仙棄旗走禽之西域傳
跋祿迦西北五百里至素葉水城比國胡商雜居
細葉川西有碎葉城

按唐碎葉水為今之圖斯庫勒

詳見水

所謂碎葉

城當在今圖斯庫勒南水豐草饒之地當時
賀魯西遁跳渡伊麗水是以定方退之至於碎

葉而奪其衆也突騎施屯碎葉西北當在今圖
斯庫勒西北境所謂攻得碎葉而徙其牙居之
者應即碎葉水南之碎葉城然考烏質勒傳攻
得碎葉之後以碎葉水為大牙伊麗水為小牙
疑當時烏質勒舊屯伊麗水西西攻得碎葉而
徙為大牙因以舊屯為小牙則舊屯當在碎葉
東北西字係東字之訛也裴羅將軍者回紇骨
力裴羅初與葛邏祿稱左右葉護後襲破拔悉

密自稱骨咄祿毗伽闕可汗又攻殺突厥白眉
可汗遣上功拜左驍衛員外大將軍當時必曾
建城於碎葉川口故稱裴羅將軍城又二十里
至碎葉城是兩城東西相距不遠咸在水南所
謂西行千里至碎葉城者自伊麗河至城及千
里也

地理志

云碎葉城北有碎葉水又云城在

川西者緣碎葉川支流四出西北通吹郭勒吹
郭勒經流千里其甫出圖斯郭勒二三百里間

亦得名碎葉水也唐跋祿迦即漢姑墨在今賽喇木拜諸城之西當圖斯庫勒東南境西北至圖斯庫勒之南山徑紆迴約五百餘里亦與唐書西域傳跋祿迦西五百里至素葉水城之說合至王方翼築碎葉應即素葉水城唐書地理志載入焉耆都督府下者因當時方翼為安西都護焉耆都督府亦隸安西故誤及之耳

吹

吹在吹郭勒南岸自圖斯庫勒西北二百里之薩
勒奇圖又西北行五百餘里統曰吹其地水草豐
饒最宜游牧其東北境為伊爾該圖鄂拉又北踰
山即左哈薩克界

薩勒奇圖

薩勒奇圖在吹郭勒南岸支河之間東南距圖斯
庫勒二百里

沙木什

沙木什在吹郭勒南岸薩勒奇圖西二十里踰一支河至其地

格格圖布拉納

格格圖布拉納在吹郭勒南岸沙木什西三十里
兩水之間踰两支河至其地

阿什圖

阿什圖在吹郭勒南岸格格圖布拉納北支河之間近傍吹郭勒東為烏蘭烏蘇

達布蘇圖

達布蘇圖在吹郭勒南岸阿什圖西南三十里支
河之間

阿爾察克圖

阿爾察克圖在吹郭勒南岸達布蘇圖西三十里
支河之間

伊蘭巴什

伊蘭巴什在吹郭勒南岸阿爾察克圖西南五十

里踰一支河至其地

庫努克薩爾

庫努克薩爾在吹郭勒南岸阿爾察克圖西四十里支河之間

索郭魯克

索郭魯克在大郭勒南岸庫克薩爾西三十里支河之間其西境支河名察罕烏蘇

哈喇巴勒圖

哈喇巴勒圖在吹郭勒南岸索郭魯克西三十里
支河之間踰烏蘭烏蘇至其地

古爾班哈納圖

古爾班哈納圖在吹郭勒南岸哈喇巴勒圖西三
十里

阿什布里

阿什布里在吹郭勒南岸古爾班哈納圖西南五
十里两支河之間又西南有河名墨爾根郭勒

和爾袞

和爾袞在吹郭勒下流南岸東傍支河西連沙磧
自薩勒奇圖至此東西五百里南北三百里舊為
準噶爾訥默庫濟爾噶爾巴圖爾烏巴什和通額
默根之昂吉

唐書西域傳細葉川長千里有異姓突厥兵數萬
耕者皆環甲相掠為奴婢

按細葉川長千里應即碎葉水之西北出者在

今則為吹郭勒自圖斯庫勒西北出經流千餘里入於和什庫勒者也吹郭勒之南水草豐饒當為異姓突厥居處

英噶爾

英噶爾在圖斯庫勒西南二百餘里踰山而至

伯得里克

伯得里克在英噶爾西南一百里自英噶爾至此又西行三百里四圍皆山中渟大澤名森格爾淖

爾宅幽勢敞東西五百里南北三百里頗占形勝
其南百里跨山至托什干達里雅通回部之烏什
城

唐書西域傳石東南千餘里有栲杆者山四環之
地膏腴多馬羊西千里距堵利瑟那東臨素葉水
水出葱嶺北原西北流入大磧望大山尋遺尚知
所指五百餘里即康也

按唐石國地為漢大宛北鄙當在今塔拉斯郭

勒之西英噶爾伯得里克在其東南相距可千里又東北與圖斯庫勒鄰接圖斯庫勒即古素葉水其地山形合沓按之史傳所紀大畧可見則英噶爾西五百里之地為揅捍故壤當不誣也

額得墨克

額得墨克在圖斯庫勒西四百里南臨額得墨克達巴烏可克達巴即塔拉斯郭勒上流發源處

唐書西域傳五努失畢部居碎葉西努失畢部有五侯斤曰阿悉結闕侯斤哥舒闕侯斤拔塞幹瞰沙鉢侯斤阿悉結泥孰侯斤哥舒處半侯斤西域傳素葉城西四百里至千泉地羸二百里南雪山三垂平陸多泉池因名之突厥可汗歲避暑其中羣鹿飾鈴鐮可狎也

按今圖斯庫勒為碎葉川即素葉水額得墨克居其西應屬唐時五努失畢部地突厥傳所謂

五侯斤居碎葉西者也又自圖斯庫勒至塔拉斯郭勒約四百里與唐書素葉城西四百里至千泉之說合額得墨克一帶即塔拉斯郭勒上游支流所彙處南倚額得墨克達巴烏可克達正所謂突厥可汗避暑處南雪山而多泉池者

塔拉斯

塔拉斯即塔拉斯郭勒下流左右濱河之地舊為準噶爾都爾伯特部游牧處伯什阿哈什之昂吉

西境有巴噶布魯勒鄂拉伊克布魯勒鄂拉有阿爾沙郭勒阿克庫勒淖爾必庫勒淖爾

唐書突厥傳統葉護可汗勇而有謀戰輒勝因并鐵勒下波斯屬賓控弦數十萬徙庭石國北之千泉遂霸西域諸國

按唐之千泉經流廣遠今塔拉斯郭勒上流自額得墨克下流西北行千餘里在唐總曰千泉石國為大宛北鄙地更偏西今突厥傳云石國

北之千泉是統葉護可汗建庭之處應在塔拉
斯郭勒下游之西故云在石國北也又唐書載
有怛邏斯城與塔拉斯音相近方位亦符說詳
後條

烏勒木木納爾

烏勒木木納爾在塔拉斯郭勒上游西百里東距
圖斯庫勒五百里又西北百里為特木爾哈巴哈

納

唐書西域傳千泉西羸百里至咀邏私城亦此國
商胡雜居有小城三百本華人為突厥所掠羣保
此尚華語又細葉川西屬怛邏斯城石常分兵鎮
之突厥傳蘇祿子吐火仙骨啜為可汗居碎葉城
引黑姓可汗尠微特勒保怛邏斯城磧西節度使
蓋嘉運和撫突騎施拔汗那西方諸國率石王莫
賀咄吐屯史王斯謹提擊吐火仙禽之疏勒鎮守
使夫蒙靈啓挾銳兵與拔汗那王掩怛邏斯城斬

黑姓可汗與其弟撥斯入曳建城回鶻傳至德後
葛邏祿寢盛與回紇爭疆徙十姓可汗故地盡有
碎葉怛邏斯諸城

按唐書西域傳稱咀邏私城在千泉西百里又
稱細葉川西屬怛邏斯城怛邏斯即今塔拉斯
邏與拉音之轉咀與怛字之訛也唐時千泉在
素葉城西四百里怛邏斯城當在素葉城西五
百里惟是兩城相距不遠是以吐火仙與黑姓

可汗倚為聲援而葛邏祿盡有碎葉怛邏斯城亦連類及之也城郭遺址雖無可考然按其方隅証以道里圖斯庫勒為碎葉水塔拉斯郭勒為千泉碎葉城既近碎葉水則怛邏斯城當近千泉其地宜在今塔拉斯郭勒西境烏勒木木納爾特墨爾哈巴哈納等處也或建城無可考應亦與怛邏斯城相遠

薩爾巴噶什

薩爾巴噶什在烏勒木木納爾西南四百里西至
有哈喇布拉達巴又西北踰哈喇布拉郭勒有小澤
曰明布拉克南踰山嶺入布魯特界

唐書西域傳咀邏私即怛邏斯城西南羸二百里至白

水城原隰膏腴南五十里有笈赤建國又二百里至石國

按怛邏斯城既在特墨爾哈巴哈納烏勒木木

納爾一帶則薩爾巴噶什正當其西南境二百

里外白水故城當在於此笈赤建國於他史無

考然為南五十里之國而其地復廣當踰山而南矣

又按唐書突厥傳蘇定方追賀魯至碎葉水賀魯咄運至石國蘇咄城城主伊涅達干迎之拘送石國又西域傳稱石為漢大宛北鄙東北距西突厥圓千餘里在千泉之南故康居小王窳匿城地是石國故疆當在塔拉斯郭勒下游之南烏勒木木納爾薩爾巴噶什西境由是西北

入右部哈薩克界南踰山入安集延諸部界則
所謂故康居窳匿城地居大宛北鄙者皆可以
次而考詳見第四十四四十五卷藩屬

以上自伊犁西行至吹塔拉斯之路

欽定皇輿西域圖志卷十三

欽定四庫全書

欽定皇輿西域圖志卷十四目錄

疆域七 天山南路一

闢展屬

闢展

塔呼

納呼

齊克塔木

特斯

特庫斯

洪

楚輝

色爾啟布

魯克察克

洋赫

哈喇和卓

阿斯塔克

玉門口

勒木丕

土爾番

招哈和屯

雅木什

安濟彥

布干

托克三

伊拉里克

連木齊木

雅圖庫

罕都

蘇巴什

森尼木

汗和羅

穆圖拉克

布拉里克

欽定皇輿西域圖志卷十四目錄

欽定四庫全書

欽定皇輿西域圖志卷十四

疆域七

天山南路一

關展屬 東至塔呼接安西北路哈密界西至伊拉
里克接哈喇沙爾界南至大磧北至博克達鄂拉
接安西北路迪化州界

關展

關展在鎮西府城西六百里距京師八千一百一
十里北望天山西北倚金嶺南臨沙山一望沙磧
傍崖為城周里許民居鱗接商賈輻輳城東八里
有湖曰東湖饒蒲葦可畜牧有屯田

見屯
政門

乾隆二

十一年十一月將軍和起追擒叛賊巴雅爾至此
公額敏和卓以兵四百及莽噶里克呢嗎扎哈沁
諸部兵來會莽噶里克呢嗎兵叛夜掠和起營和
起背腹受敵被創數處顧其部兵努固德彰金布

云我今力竭必死此地拔所戴翎命持繳巴爾庫
勒叅贊大臣營努固德曰偕將軍力戰突出即免
矣起曰身為大臣不能擒叛賊反逃死乎努固德
等行乃死叛賊等尋即擒誅闢展復定設兵駐防
為回部東境門戶云

漢書西域傳武帝天漢二年以匈奴降者介和王
為開陵侯擊車師匈奴救之漢兵引去征和四年
遣開陵侯將樓蘭尉犁危須兵共圍車師車師王

降服地節二年遣侍郎鄭吉校尉司馬意擊車師
破之匈奴聞車師降漢攻車師車師王奔烏孫詔
田渠犁及車師積穀以安西國車師王之走烏孫
也烏孫留不遣遣使上書願留車師王備國有急
可從西道以擊匈奴漢許之於是召故車師太子
軍宿于焉耆立以為王徙居渠犁遂以故地與匈
奴

後漢書西域傳和帝永元三年復置戊己校尉領

兵五百人居車師前部高昌僻孝和晏駕西域背
叛安帝元初六年車師前王來降數月北匈奴擊
走前王其後北虜連與車師入寇河西以班勇為
西域長史遂破平車師自伊吾北通車師前部高
昌僻一千二百里自高昌僻北通後部金滿城五
百里此其西域之門戶也

魏書高昌傳高昌東西二千里南北五百里四面
多大山或云昔漢武遣兵西討其中兀困者因住

焉地勢高敞人庶昌盛因云高昌其地有漢時高
昌壘故以為國號晉以其地為高昌郡張軌呂光
沮渠蒙遜據河西皆置太守以統之去敦煌十三
日行國有八城皆有華人地多石磧氣候溫暖厥
土良沃北赤石山七十里有貪汙山此山北鐵勒
界也世祖時闕爽為高昌太守太延中遣散騎侍
郎王恩生等使高昌為蠕蠕所執真君中爽為沮
渠無諱所襲和平元年為蠕蠕所并以闕伯周為高

昌王其稱王自此始也太和初伯周死子義成立
為其兄首歸所殺自立為高昌王五年高車王可
至羅殺首歸兄弟以敦煌人張孟明為王後為國
人所殺立馬儒為王二十一年奉表朝貢求內徙
高祖納之而高昌舊人不願東遷相與殺儒立麴
嘉為王又臣於蠕蠕及蠕蠕主伏圖為高車所殺
嘉又臣高車遣使奉表嘉死贈鎮西將軍涼州刺
史子堅立遣使朝貢

周書異域傳高昌者車師前王之故地自麴嘉以來世脩蕃職於魏大統十四年詔以其世子元喜為王恭帝二年又以其田地公茂嗣位自敦煌向其國多沙磧道里不可准記惟以人畜骸骨及駝馬糞為驗又有魍魎怪異故商旅往來多取伊吾路云

隋書西域傳高昌國者漢車師前王庭也開皇十年突厥破其四城有二千人來歸大業四年遣使

貢獻明年伯雅來朝從擊高麗還尚宗女華容公主自是歲貢方物

唐書西域傳高昌直京師西四千里而羸其橫八百里縱五百里凡二十一城武德初伯雅死子文泰立貞觀四年文泰來朝賜氏李文泰與西突厥通西域朝貢道其國咸見壅掠伊吾內屬文泰擊之又破焉耆三城焉耆王訴諸朝乃拜侯君集為交河道大總管左屯衛大將軍討之文泰死子智

成立

侯君集傳
作智盛囊

君集分兵畧定凡三州五縣二十

二城披其地皆州縣之號西昌州後改西昌曰西

州更置安西都護府俘智盛徙高昌豪傑于中國麴

氏傳國九世百三十四年而亡地理志西州交河

郡貞觀十四年平高昌以其地置開元中曰金山

都督府天寶元年為郡縣五前庭柳中文河蒲昌

天山

宋史外國傳唐貞觀中侯君集平高昌為西州安

史之亂其地陷沒乃復為國然其地頗有回鶻故亦謂之回鶻建隆三年西州回鶻來貢太平興國六年其王始稱西州太宗遣供奉官王延德使高昌雍熙元年還叙其水程來獻

王延德高昌行紀其地南距于闐西南距大食波斯西距西天步路涉雪山葱嶺皆數千里所統有南突厥北突厥大衆馱小衆馱樣磨割祿點憂司末蠻格哆族預龍族之名甚衆師子王邀延德至

其北庭歷交河州凡六日至金嶺口度嶺一日至北庭憇高臺寺見其王及王子侍者皆東向拜受賜旁有持磬者擊以節拜王聞磬聲乃拜既而王之兒女親屬皆出羅拜以受賜游佛寺曰應運大寧之寺貞觀十四年造西抵安西即唐之西境

明史西域傳永樂四年遣官使巴什伯里

舊作別失八里

今改正

道土爾番

舊作吐魯番今改正

幣賜之二十年其首為

巴什伯里所逐走京師遣還故土初其地微弱哈

喇和卓

舊作火州
今改正

柳城皆為所并國日強僭稱王

入貢先後命指揮白金等使其國成化九年據哈

密十八年哈密都督哈森

舊作罕慎
今改正

克之宏治元

年誘哈森殺之復據其城正德九年犯肅州嘉靖

三年寇肅甘州而賊黨雅蘭

舊作牙蘭
今改正

率所部來

歸勢漸孤弱萬歷朝入貢不絕

按闕展全境漢屬車師前國孤胡國及車師後

城長山北六國地晉為高昌郡魏為蠕蠕所并

後其國復立不一姓迄于周隋唐貞觀十四年
置西州安史之亂其地遂陷宋入回鶻元設萬
戶府明為土爾番柳城諸地此古昔沿革之大
畧也至班書有前後卑陸東西且彌劫國狐胡
蒲類郁立師范書無西且彌卑陸劫國郁立師
而有移支一兼車師為六國一去車師為六國
今以班范二書參考之卑陸也且彌也郁立師
也劫國也蒲類也車師也狐胡居車師柳谷得

以車師統所謂車師六國也車師後國蒲類國在天山西車師前國狐胡國在金嶺南其居金嶺北天山南者卑陸前後國也東且彌也西且彌也劫國也郁立師也所謂山北六國也山指今自多倫達巴迤東一帶支山而言魏書謂之赤石山非北天山正幹之謂也車師六國地統在天山之南跨金嶺之南北凡五百里即後漢書所謂自高昌辟北通後部金滿城五百里魏

書隋書南北五百里唐書縱五百里者如今金
嶺環抱內外諸城皆是若天山以北乃匈奴鐵
勒所居非六國地不得誤會山北六國之文而
求之博克達鄂拉之陰也

又按魏書高昌國東西二千里隋書東西三百
里唐書橫八百里說各不同以今道里及歷代
形勢考之魏太祖欲以伊吾五百里居馬儒而
不果則其境當在伊吾以西焉者以東安得有

二千里之廣語殊失實隋開皇十四年突厥破其四城是以其境止三百里視今較狹唐侯君集下高昌二十二城盡有漢車師六國之地所謂縱五百里橫八百里者乃與今時疆域相符矣

漢書西域傳狐胡國治車師柳谷西至都護治所一千一百四十七里至焉耆七百七十里

唐書侯君集傳君集次磧口而文泰死進營柳谷

諸將請襲之君集不可姜行本傳高昌之役為行軍都總管出伊州距柳谷百里依山造攻械

按今自洪出磧口西行至闕展為第一程南臨沙山其地應即漢時柳谷君集次磧口而進營行本出伊州而造械皆在沙山北麓往來必經之道即今闕展無疑也

又按唐書地理志交河縣北入谷百三十里經柳谷交河縣為今招哈和屯則柳谷似在招哈

和屯北然當時君集行本出伊州進伐從東南
來先營柳谷次拔都城則柳谷必居東南境上
安得在招哈和屯北乎又今魯克察克為唐柳
中縣在闕展城西七十里居集留營七十里外
既而進拔其城中間道里相距不遠是柳中柳
谷自屬毗連之境因地以名其縣者也

塔呼

塔呼東接鎮西府屬之托來達巴一百四十里為

闕展東境西距闕展城二百八十里自托來達已
西行二十里至北山下峭壁削成曲徑如鑿無水
草路平可行車又三十里出山路皆沙磧又五十
里有樹木無水得二井味鹹而苦又三十里皆鹵
地凝結成塊車馬艱于行

魏書高昌傳太和二十一年高昌王馬儒求內徙
高祖納之遣明威將軍韓安保率騎千餘赴之儒
遣禮嘉率步騎一千五百迎安保去高昌四百里

而安保不至禮等還高昌

按韓安保自伊吾赴高昌而禮嘉來迎當在高昌城東四百里之地今自塔呼西至招哈和屯四百里應是當時禮嘉迎韓安保處也

納呼

納呼在塔呼西七十里西距闡展城二百一十里四圍皆山濱湖之地可駐牧其西谷口狹而深為闡展東境關隘

漢書西域傳車師旁小金附國隨漢軍後盜車師
車師王復自請擊破金附

按小金附國當在車師國東今納呼在闢展最
東境上山形環抱險足以守疑即當時金附國
地

齊克塔木

齊克塔木在納呼西一百四十里東距闢展城七
十里自納呼西入谷口山徑崎嶇自高而下七十

里就平地又七十里至齊克塔木有水草可駐牧
有墩有城

按唐侯君集伐高昌畧定三州五縣二十二城
今闢展境內金嶺南凡十三城金嶺北凡七城
金嶺東凡五城而東境之城則自齊克塔木城
始總計實不止二十二城則歷朝建置不一非
盡唐時舊蹟矣

特斯

多
卷十四
特斯在齊克塔木西三十里西距闢展城四十里
有墩有臺

特庫斯

特庫斯在特斯西二十里西距闢展城二十里有
墩有臺有水北流名巴哈言小也

洪

洪在特庫斯南二十里有城當山谷口東南通額
什墨西北距闢展城二十里

唐書西域傳侯君集討高昌其王文泰謂左右曰
度磧疲鈍以逸待勞卧收其敝耳十四年聞王師
至磧口悻駭無他計發病死

宋史外國傳王延德使高昌至鬼谷口避風驛凡
八日至澤田寺高昌聞使至遣人來迎次歷地名
寶莊又歷六種乃至高昌高昌即西州也

按古通高昌有數道一自伊吾西行隋書高昌
傳從武威西北有捷路度沙磧千餘里四面茫

然無有蹊徑故客商往來多取伊吾路是也一
自敦煌度莫賀延磧北行唐書西域傳侯君集
伐高昌王師至磧口攻田地城是也宋王延德
使高昌始歷伊州次歷納職縣城至鬼谷口澤
田寺寶莊六種以抵高昌則自伊吾復繞道南
行折而西北仍從莫賀延磧之北口以抵其境
者也

又按漢書西域傳元始中車師後王國有新道

出五船北通玉門關往來差近戊巳校尉徐普
欲開以省道里半避白龍堆之阨三國志引魏
畧從玉門關西北出經橫坑避三隴沙及龍堆
出五船北到車師界此為漢魏時自玉門關西
北通車師之道在今則自敦煌縣西北至關展
皆取道於哈密折而西行不涉流沙龍堆之地
或即漢魏時故道然哈密為漢伊吾而班史所
述又無取道伊吾之文疑自今之敦煌縣西折

而北行不歷哈密徑趨闕展又別有一道而不
可考也至莫延賀磧在闕展東南境侯君集王
延德入口之處當屬今之洪地即唐書所謂磧
口者則固較然可覩云

楚輝

楚輝在洪西北二十里南倚金嶺東北距闕展城
二十里西距魯克察克城五十里背山為城城東
有泉從闕展城北西南流經楚輝城南

魏書高昌傳明威將軍韓安保遣使韓興安等十
二人使高昌高昌王馬儒復遣顧禮將其世子義
舒迎安保至白棘城去高昌一百六十里按魏高
昌國都在今土爾番楚輝西距土爾番城一百六
十里應是魏白棘城地

色爾啟布

色爾啟布在楚輝西四十里金嶺下東北距闕展
城六十里西南距魯克察克二十里不當孔道地

近山少可耕之地有水從北山下出南流經城東分二支流其西一支經魯克察克城南以溉田園利甚溥

按唐書地理志西州交河郡統前庭柳中交河蒲昌天山五縣而柳中居其東柳中即今魯克察克則自魯克察克城東至色爾啟布楚輝闕展諸城當屬唐時柳中縣地

魯克察克

魯克察克舊對音為魯克沁在楚輝西五十里東北距闢展城二百十里東有長河由色爾啟布西南流至其境為闢展東最大聚落唐柳中縣治也雍正初年土爾番回首額敏和卓避準噶爾侵掠遷於此十二年移駐瓜州乾隆二十四年西域平復還故地

漢書西域傳戊巳校尉屯田居車師故地校尉刁護病遣使陳良屯桓且谷備匈奴寇司馬丞韓元

領諸驛右曲侯任商領諸壘將數千騎至校尉府
分告諸驛得三百四人去校尉府數里止晨火難
校尉開門擊鼓收吏士良等隨入遂殺校尉刁護
止留戊己校尉城

後漢書西域傳延光二年敦煌太守張當上書言
若不能出兵可置軍司馬將士五百人四郡供其
犁牛穀食出據柳中此中計也帝納之乃以班勇
為西域長史將弛刑士五百人西屯柳中勇遂破

平車師又伊吾北有柳中皆膏腴之地

唐書侯君集傳君集次磧口而文泰死子智盛囊襲位進營柳谷於是鼓而前賊嬰城自守遣諭之不下乃刊木塞塹引撞車毀其堞飛石如雨所向無敢當因拔其城俘男女七千進圍都城西域傳高昌田地城戍已校尉所治也侯君集伐高昌王師至磧口奄攻田地城契苾何力以前軍鏖戰是夜星墜城中明日拔其城虜七千餘人

文獻通考唐平高昌以田北城

即田北城

為柳中

元史地理志西北地附錄魯克察克

舊作魯古塵今改正

明史西域傳柳城一名魯城又名柳陳即後漢柳

中地唐置柳中縣西去哈喇和卓七十里東去哈

密千里經一大川渡流沙在火山下有城屹然廣

二三里即柳城也四面皆田園流水環繞樹木蔭

翳永樂四年劉特穆爾

舊作帖木兒今改正

使巴什伯里因

命齋幣賜柳城酋長嗣是屢入貢柳城密邇哈喇

和卓土爾番凡遣朝使及酋長入貢都與之偕後
土爾番疆遂為所滅

按今魯克察克本漢柳中地戊巳校尉城此因
名柳城後訛為柳陳轉為魯城復轉為魯古塵
肅州新志作魯谷慶一名魯普秦後名魯克沁
要不外音之相襲成訛也通考唐以田北城為
柳中縣即西域傳所謂田地城北與地字相類
當屬傳寫之誤其城即漢戊巳校尉後漢長史

班勇所居本屬漢柳中地是以唐為柳中縣與
唐書載田地縣戊巳校尉所居之說合明史稱
戊巳校尉城在哈喇和卓其說為無據矣

洋赫

洋赫在魯克察克西北二十里東北距闕展城二
百三十里亦以金嶺為屏障有小城

哈喇和卓

哈喇和卓在洋赫西北三十里東北距闕展城二

百六十里地方三里許舊城已廢民別居小堡土膏肥美水源北出金嶺下經沙磧至漆金口匯為大渠入哈喇和卓唐交河郡高昌縣治也

隋書西域傳高昌國其都城周迴一千八百四十步國內有城十八

唐書地理志西州交河郡領縣前庭本高昌寶應元年更名

文獻通考唐平高昌以高昌為高昌縣

元史地理志

西北地附錄哈喇和卓

舊作合刺火者今改正

明史西域傳

和卓

舊名火州今改正

又名哈喇在柳城西

七十里土爾番東三十里即漢車師前王地隋時

為高昌國元名和卓統號輝和爾置達爾噶齊

舊作

達魯花亦今改正

監治之永樂四年命劉特穆爾齋綵幣

賜其王子哈散明年遣貢方物十一年秋命陳誠
李暹等以璽書文綺往勞僧寺多於民居東有荒
城即高昌國西北連巴什伯里國小不能自立後

為土爾番所并

按隋高昌國都城即唐西州交河郡治所統前庭
柳中交河蒲昌天山五縣前庭與交河郡同治今
洋赫哈喇和卓阿斯塔克土爾番諸城是也柳中
居前庭之東今魯克察克以東諸城是也交河居
前庭之西今招哈和屯以西諸城是也蒲昌縣以
蒲昌海得名在前庭縣東南今其邊界不可考約
自勒木丕城迤東南一帶是也天山縣在前庭縣

北以天山得名今之金嶺以北諸城是也唐書
地理志前庭縣注本高昌是唐改高昌縣為前
庭縣即隋高昌國都城明史誤稱哈喇和卓為
火州遂謂山色青紅如火漢戊巳校尉所治今
考其地知和卓與火州以音近而訛山色如火
又以火州之訛而傳會其辭實皆無據漢戊巳
校尉治在魯克察克亦與哈喇和卓無涉

阿斯塔克

阿斯塔木在哈喇和卓西五里東北距闕展城二百六十五里有城相傳其先國師所居有河自金嶺南麓南行分二支流其東流經哈喇和卓城右西流經哈斯塔克城右

玉門口

玉門口在哈喇和卓西北十里東距闕展城二百七十五里東北兩山陡立徑寬平內外皆有墩臺舊有關名古玉門關已毀在口玉二小字可辨為

土爾番及哈喇和卓往山北大路入谷迤西北行
十餘里出北口東北十五里至森尼木

按此舊傳為古玉門關第考漢書地理志玉門
關陽關皆在敦煌郡龍勒縣西域傳出陽關自
近者始曰婁羌去陽關千八百里西北至鄯善
鄯善西北至車師千八百九十里是玉門陽關
皆在車師東南千餘里土爾番即車師焉得有
玉門關乎蓋其國慕中國玉門關之名故以名

其山口後中國人至此謂即漢玉門關者非也

勒木丕

勒木丕在阿斯塔克西南二十里東北距闕展城二百八十五里有小城南抵沙磧西南行四百里至羅布淖爾

唐書地理志交河郡領縣蒲昌本絳庭州後來屬西有七屯城弩支城石頭鎮潘仙鎮

按今勒木丕西南經羅布淖爾當屬唐蒲昌縣地特其城鎮遺墟湮於沙磧不可得而考矣

土爾番

土爾番舊對音為吐魯番在阿斯塔克西北五十八里東距闐展城三百二十三里北倚金嶺嶺麓有泉南流周繞國城民田資其灌溉地廣土肥氣溫暖無雨雪唐高昌縣有安樂城即其遺址也乾隆二十一年封莽噶里克為扎薩克公駐其地尋

叛伏誅封額敏和卓子素齊滿於此

明史西域傳土爾番在哈喇和卓西百里去哈密千餘里唐置西州交河縣此則交河縣安樂城也

按今土爾番城即唐安樂城故址肅州新志稱其西北百里有靈山今考土爾番城北距金嶺甚近而博克達鄂拉則在土爾番城西北百里外是肅州新志所謂靈山者應指今博克達鄂拉而言而土爾番城為安樂城故地益可見矣

招哈和屯

招哈和屯亦稱交河城在土爾番城西二十里東
距闕展城三百五十里招哈郭勒出其北郭勒之
水分道南流環城左右即漢時交河舊地也北倚
金嶺峯巒層疊經城西而迤南形勢佳勝民物殷
繁

漢書西域傳車師前國治交河城西南至都護治
所千八百七里至焉耆八百三十五里地節二年

年侍郎鄭吉校尉司馬憲發城郭諸國兵萬餘人
自以所將田士千五百人擊車師攻交河城破之
後漢書西域傳建初元年酒泉太守段彭大破車
師於交河城

唐書西域傳高昌王都交河城漢車師前王庭也
侯君集伐高昌軍進填隍引衝車飛石如雨城中
大震智盛謁軍門請改事天子君集諭使降詞未
屈薛萬均勃然起曰當先取城小兒何與語麾而

通志卷十四
表十四
進智盛流汗伏地曰唯公命乃降

地理志交河郡交河縣縣北八十里至龍泉館又
北入谷一百三十里經柳谷度金沙嶺經石會漢
戍至北庭都護府城

文獻通考君集以兵傳其城智盛降以交河城為
交河縣

按漢書焉耆國西南至都護治所四百里車師
前國至焉耆者八百三十五里由車師前國假道

焉者至都護治所實不過一千二百三十五里
如取徑道宜更有近于此者安得自車師前國
至都護治所有一千八百七里之遠乎卑陸國
南接車師去都護治所一千二百八十七里則
此八百字應亦二百字之誤又漢書載車師六
國大者三百戶小者或四五十戶惟車師前王
國實七百戶當不一城以形勢求之自交河城
以東至闐展諸城凡在金嶺環抱中者當盡屬

車師前國地也

雅木什

雅木什在招哈和屯西南十五里東距闡展城三百六十八里城周里許東倚金嶺西北望都魯達巴招哈郭勒之水自金嶺西出折而東南流至雅木什南

安濟彥

安濟彥在雅木什西五里東距闡展城三百七十

三里城周里許不當孔道

布干

布干在安濟彥西南三十里東距闕展城三百八十三里有城周二里許山北有泉石哈畢爾噶南流成大澤在磧中

托克三

托克三在布干西南六十里東距闕展城四百十三里有城周二里許西北直都魯達巴自此南行

十里至蘓巴什塔克又西行通哈喇沙爾

按自布干托克三以西至蘓巴什谷口為闡展
西境分住回民均隸闡展至諸處安設臺站則
析屬於哈喇沙爾以均勞逸與疆域原隸方隅
不同凡回部各屬交界處多有類是者為例舉
於此臺站別詳兵防門

伊拉里克

伊拉里克在托克三西四十里東距闡展城四百

五十三里有城周里許北直都魯達巴闕展西盡境也

按唐交河郡凡五縣天山縣在金嶺北天山南蒲昌縣在前庭南近蒲昌海其在金嶺南者為前庭柳中交河三縣前庭以高昌城置宜居中柳中以田地城置宜居東交河以交河城置宜居西今自招哈郭勒以西雅木什布干托克三伊拉里克諸城當屬漢交河縣地特其縣治在

今招哈和屯耳

連木齊木

連木齊木在闕展城西八十里由山南色爾啟布
入谷遷迤東行二十里出山北口東傍山麓有小
城有水經城西北流西境皆平田為漢車師後城
長國地

按連木齊木南距魯克察克四十五里魯克察
克為漢戊巳校尉後漢長史所居之城則此當

為漢書西域傳所載後城長國也

雅圖庫

雅圖庫在色爾啟布北山口內七里東距闕展城七十里東行有岐路轉而西北會于連木齊木有小城為漢車師都尉國地

按漢書於車師都尉國後城長國牽連得書必其境地毗連者今雅圖庫與連木齊木附近又北接罕都其為漢城遺址可知

罕都

罕都在連木齊木東北二十五里東南距闢展城一百里有土城西南有小山上有二墩相傳漢時所築並訛稱其地為漢墩

按罕都方位與車師都尉國後城長國相屬應亦當時二國所隸之境

蘓巴什

蘓巴什在連木齊木西二十五里東距闢展城一

百五里地有小堡迤西入北山口東西兩岸石壁
峭立或沙坡斜倚谷間水流甚急艱於行名土域
溝

漢書西域傳郁立師國王治內咄谷東與車師後
城長西與卑陸北與匈奴接

按郁立師于漢亦小國藏山谷間今之森尼木
為卑陸國居西連木齊木為車師後城長國居
東則此宜為郁立師國也

森尼木

森尼木在蘓巴什西三十里西距闕展城一百三十五里有城城西有長河南流為漢卑陸前國地

漢書西域傳卑陸前國王治天山東乾當國南至都護治所千二百七十八里

魏畧卑陸國并屬車師部

按漢書乾當國應為乾當谷三國志引魏畧作卑陸國亦傳寫之訛也

汗和羅

汗和羅在森尼木東北一百里東南距闕展城一百五十里天山下不當孔道山形環抱地勢幽敞土爾番北鄙也為漢卑陸後國地

漢書西域傳卑陸後國王治番渠類谷東與郁立師北與匈奴西與劫國南與車師接

按卑陸前後國亦居山谷今之蘓巴什為郁立師國居東穆圖拉克布拉里克為劫國居西則

今森尼木汗和羅宜為旱陸前後國也

穆圖拉克

穆圖拉克在森尼木西北六十里東南距闕展城
一百九十五里不當孔道

布拉里克

布拉里克在森尼木西北七十里東南距闕展城
二百五里不當孔道又北為塔里朗地有小泉足
資灌溉又西南有地名雅圖西南踰小山抵安濟

彥

漢書西域傳劫國王治天山東丹渠谷西南至都護治所千四百八十七里

按穆圖拉克與布拉克相去僅十里當是一國漢書稱卑陸西與劫國接今此二堡在森尼木之東則當為劫國故地

又按開展全境形勢北峙天山東西綿亘至今迪化州之南由托克喇鄂拉折而北行百餘里

為博克達鄂拉復折而東南行此北行百餘里之
地南北綿亘又自托克喇鄂拉之東哲爾格斯
鄂拉分支為都魯達巴迤東為金嶺當土爾番
北此一支山在北天山正幹之南亦東西綿亘
金嶺都魯達巴以南南東自關展城西至伊拉里
克為車師前王國地金嶺以北東自連木齊木
西至布拉克為車師後城及山北六國地面
臨金嶺背倚天山漢書稱卑陸國治乾當谷後

國治番渠類谷郁立師國治內咄谷西且彌國
治于大谷東且彌國治允虛谷劫國治丹渠谷
者皆在兩山之間故皆以谷名也又稱卑陸且
彌劫國治天山東自托克喇鄂拉至博克達鄂
拉南北綿亘百餘里金嶺以北諸城居其東境
故曰在山東也諸國沿革史無明文然以漢書
東西方位驗之有可推而知者自金嶺以南諸
城為車師前庭高昌僻無論已其山南嶺北諸

國卑陸東與郁立師西與劫國接故劫國居西
為今之穆圖拉克布拉克卑陸居東為今之
森尼木又東則郁立師為今之蘓巴什也郁立
師東與車師後城長國接則車師後城長國在
郁立師東為今之連木齊木也東西且彌國班
史方位不詳然考東蒲類王茲力支降都護分
車師後王之西為烏貪訾離地以處之而烏貪
訾離國南與且彌接可知烏貪訾離即車師後

國分地而且彌在烏貪訾離之南車師後王國
在今博克達鄂拉北且彌國當在其南再以居
天山東谷之文証之其國當在都魯達巴北博
克達鄂拉南溪谷之間又范史無西且彌國當
時必為東且彌所并三國志引魚豢魏略東且
彌國西且彌國皆并屬車師後部是又以山南
而隸乎山北也

欽定皇輿西域圖志卷十四